

Այս դասի (մտախիվացնող ներածական տեսանյութ+ դասի տեքստ+ բառարան+ինքնաստուգիչ հարցեր) յուրացման համար հարկավոր է մինչև 4 ժամ:

ԴԱՍ 10

ՍՈՑԻԱԼԱԿԱՆ ԱՇԽԱՏՈՂՆԵՐԻ ԵՎ ԱՅԼ ՄԱՍՆԱԳԵՏՆԵՐԻ ԴԵՐԱԿԱՏԱՐՈՒԹՅՈՒՆԸ ԻՐԱՎԱԽԱԽՏՈՒՄ ԿԱՏԱՐԱԾ, ՀԱՆՑԱԳՈՐԾՈՒԹՅՈՒՆԻՑ ՏՈՒԺԱԾ ԿԱՄ ՀԱՆՑԱԳՈՐԾՈՒԹՅԱՆ ՎԿԱ ԱՆՉԱՓԱՀԱՍՆԵՐԻ ՎԵՐԱԿԱՆԳԵՄԱՆ ԳՈՐԾՈՒՄ

Ցուցումներ

ՄՈՏԻՎԱՑՆՈՂ ՆԵՐԱԾԱԿԱՆ ՏԵՍԱՆՅՈՒԹ (Հասանելի է Արդարադատության ակադեմիայի կայքի հեռուստուցման բաժնում և հեռուստուցման փաթեթի կրիչում)



Մինչև 5 րոպե

Անչափահասների արդարադատության համակարգի կարևորագույն բաղադրիչներից է ոչ միայն մասնագիտացված դատարանը, այլև երեխաների սոցիալական ներառումը, վերականգնումը և վերասոցիալականացումը, որոնք իրականացվում են օգնող մասնագետների, հիմնականում՝ սոցիալական աշխատողների, սոցիալական մանկավարժների և հոգեբանների կողմից:

Ուշադրությամբ կարդացե՛ք տեքստը (օգտվելով բառարանից) և այն յուրացնելուց հետո միայն անցե՛ք հաջորդ մասերին /ինքնաստուգիչ հարցեր, առաջադրանք/:



Մինչև 180 րոպե

Անչափահասների հետ աշխատող տարբեր մասնագետների փորձը վկայում է, որ զուտ պատժի կիրառումը չի կարող կրճատել հանցագործությունների թիվը: Անհրաժեշտ է

կարևորել նաև անձի վերասոցիալականացմանն ուղղված միջոցառումները: «Արարք-պատիժ» մոտեցումը ենթադրում է, որ իրավախախտ վարք ցուցաբերող անհատը խնդիրներ է ստեղծում հասարակության և իր համար, ուստի նրան պատժում են հիմնականում մեկուսացման միջոցով: ՔԴՕ միջառք հողվածներ նախատեսում են մանկավարժի մասնակցությունը անչափահասի մասնակցությամբ դեպքերի քննության ժամանակ: Սակայն միայն մանկավարժ մասնագետն ի վիճակի չէ լիարժեք կատարել վերականգնողական արդարադատության պահանջները: Ժամանակակից աշխարհում տեղի է ունեցել մասնագիտացումների նեղացում և տարբերակում, ինչն ապահովում է ավելի նպատակային գործունեություն յուրաքանչյուր դեպքի համար: Իրավախախտում կատարած անձանց իրավախախտների ուղղման գործում տարբեր երկրներում հաջողությամբ կիրառվում է սոցիալական աշխատանքը: Սոցիալական աշխատողների, սոցիալական մանկավարժների և հոգեբանների մասնագիտական գիտելիքներն ու կարողություններն այսօր լայնորեն կիրառվում են պրոբացիոն ծառայությունում, մեդիացիայի գործընթացում, կանխարգելիչ և վերականգնողական արդարադատության համակարգի այլ ծառայություններում: Յուրաքանչյուր դեպք դիտարկելիս դատարանը փորձում է օրենքի շրջանակներում անհատականացնել դեպքը, հաշվի առնել դրա առանձնահատկությունները: Իսկ այդ գործընթացն ապահովող կարևոր դերակատարը սոցիալական աշխատողն է:

Փորձե՛ք հիմնավորել դեպքերի քննության ժամանակ մանկավարժի մասնակցության անհրաժեշտության գաղափարը:

Անչափահասների արդարադատության շրջանակներում մանկավարժների, սոցիալական աշխատողների և առհասարակ օգնող մասնագետների դերը կարևորվում է միջառք առումներով: Օգնող մասնագետները անչափահասների արդարադատության համակարգում լուծում են կարևորագույն խնդիր՝ անչափահասի սոցիալ-հոգեբանական զարգացման

ապահովումը և վարքի շտկումը:

Անչափահասների հարցերով արդարադատությունը անչափահասին չի դիտարկում միանշանակ մեղավոր, այլ դիտարկում է որպես սոցիալական միջավայրում, այսպես կոչված, «դժվար հասանելի» ռեսուրսների կամ այդ ռեսուրսների ոչ հավասար բաշխելու պատճառով տուժած անձ, ով այդ ռեսուրսների համար մղվող «պայքարում» կարող է երբեմն դրսևորել հակասոցիալական վարք: Մոտեցումը կիրառվում է այն համոզմունքից ելնելով, որ հասարակությունը չպետք է պատժի երեխային, այլ պետք է օգնի վերջինիս գիտակցելու իր արարքը և փոխհատուցելու վնասը ոչ թե ազատագրկման, այլ նրան հասարակություն վերաինտեգրելու միջոցով:

Իրավախախտում կատարած անչափահասների հետ աշխատանքում օգնող մասնագետների գործունեությունը հնարավորություն է տալիս.

1. Խորությամբ ուսումնասիրել հանցագործությանը դրդող պատճառները՝ հիմնվելով անչափահասի և նրա ընտանիքի կարիքների ամբողջական գնահատման վրա: Հատուկ ուշադրություն դարձրե՛ք կետերին:
2. Մեղմել դատավճիռը, անգամ հնարավոր որոշ դեպքերում կանխել իրավախախտում կատարած անչափահասի ազատագրկումը (ինչի բացասական ներգործությունը միանշանակ հաստատված է) [1]:
3. Հիմնավորել մեղադրյալին այլընտրանքային պատժի կամ պայմանական ազատագրկման ենթարկելու որոշման նպատակահարմարությունը:

4. Կազմել անհատական վերականգնման պլան՝ երեխայի և նրա ընտանիքի հետ խորհրդատվությունների հիման վրա անչափահասի վարքն ուղղելու և այդպիսով կրկնահանցագործությունը կանխարգելելու նպատակով:
5. Իրականացնել անհատական ծրագրեր՝ նախաձեռնելով միջամտությունների մի ամբողջ շարք, որը կարող է ընդգրկել սոցիալական դեպքերի հետ անհատական աշխատանք, խմբային աշխատանք, ընտանեկան և անհատական թերապիա:
6. Համագործակցել կրթական հաստատությունների հետ՝ երեխաներին վերաինտեգրելու կրթական համակարգ:
7. Ստեղծել համագործակցության հիմքեր և համագործակցել բոլոր այն գործակալությունների և շահագրգիռ կազմակերպությունների հետ, որոնք առնչվում են տվյալ դեպքի հետ: Փորձե՛ք ուրվագծել նշված մասնագետների հետ Ձեր համագործակցության եզրերը:

Սոցիալական դեպքի արդյունավետ վարումը հնարավոր է բազմամասնագիտական թիմի արդյունավետ համագործակցության դեպքում: Որպես կանոն, իրավախախտում կատարած անչափահասների հետ աշխատող բազմամասնագիտական թիմի անդամ են հանդիսանում սոցիալական աշխատողը, հոգեբանը, սոցիալական մանկավարժը և հարակից այլ մասնագետներ: Թիմում ընդգրկվում են նաև այն մասնագետները, ովքեր քաջատեղյակ են ընտանիքից կամ երեխայից, ինչպես, օրինակ՝ երեխայի հետ աշխատող ոստիկանը, պոլիկլինիկայի բժիշկը, ուսուցիչը և այլն: Մասնագիտական թիմում սոցիալական աշխատողը հանդիսանում է թիմի համակարգող, ում պարտա-

կանությունների մեջ է մտնում տարբեր մասնագետների գործողությունների համաձայնեցումը: Սոցիալական դեպք վարողը խնդիրը դիտարկում է որպես առաջադրանքների շարք, որոնք պետք է կատարվեն աջակցային ցանցի կողմից:

Անչափահասների արդարադատության համակարգում բազմամասնագիտական թիմի վերականգնողական մոտեցումները տարբերվում են՝ կախված աշխատանքի համատեքստից և այն կառույցից, որում աշխատում է մասնագետը:

Ըստ այդմ՝ անչափահասի հետ վարվող աշխատանքում բազմամասնագիտական թիմի ներգրավումը արդարադատության համատեքստում արդյունավետ է հետևյալ մակարդակներում.

- դատարանում իրականացվող վերականգնողական աշխատանք,
- ոստիկանությունում հաշվառված և համայնքային վերականգնողական կենտրոն ուղղորդված անչափահասների հետ աշխատանք,
- քրեակատարողական հիմնարկում իրականացվող վերականգնողական աշխատանք:

Բազմամասնագիտական թիմի կարևորագույն նպատակն է անչափահասի վերականգնման գործընթացը կազմակերպել դեռևս քննչական փուլում, քանի որ անչափահասների իրավունքների պաշտպանության լավագույն ձևն է համարվում սոցիալական ադապտացիայի, ընտանիքում, համայնքում, դպրոցում կամ այլ ուսումնական հաստատությունում կոնֆլիկտների հաղթահարման գործընթացների կազմակեր-

պումը: Այդ իսկ պատճառով օգնող հարաբերությունների հաստատումը հանդիսանում է անչափահասների արդարադատության համակարգի կարևոր գործառույթներից մեկը: Կարևոր են նաև օգնող մասնագետների և քննչական մարմինների միջև համագործակցությունը, ինչպես նաև նախաքննության փուլում տարվող աշխատանքները: Այս փուլում հոգեբանը ունենում է մի շարք հանդիպումներ իրավախախտում կատարած անչափահասի և նրա ընտանիքի հետ, քանի որ այս փուլը բավական սթրեսային է ինչպես շահառուի, այնպես էլ նրա ընտանիքի համար (ազատագրկման հետ կապված վախ, ապագայի անորոշության վախ և այլն):

Սոցիալական մանկավարժը նախնական տեղեկատվություն է հավաքագրում իրավախախտում կատարած անչափահասի և նրա վրա ազդող դաստիարակչական գործոնների վերաբերյալ: Սոցիալական աշխատողը այս փուլում կապ է հաստատում բոլոր այն կառույցների հետ (ընտանիք, բուժհաստատություն, դպրոց, համայնք, սոցիալական ծառայություններ և այլն), որոնք ինչ-որ կերպ առնչվում են իրավախախտում կատարած անհատի հետ և հավաքագրում է իրեն անհրաժեշտ բոլոր տվյալները, որ անհրաժեշտ են հետագա գործողությունների պլանավորման համար: Դատարանում ներգրավված սոցիալական աշխատողը պատասխանատու է ուղղակիորեն աշխատելու այն երեխաների և երիտասարդների հետ, ովքեր անցնում են դատական գործընթացով որպես մեղադրյալներ, տուժողներ և վկաներ:

Երբ անչափահասը հանդես է գալիս որպես մեղադրյալ, սոցիալական աշխատողը հանդես է գալիս նախադատարանային սոցիալական զեկույցով, որտեղ մանրամասնորեն բացահայտում և հիմնավորում է անչափահասի կողմից գործած հանցանքի պատճառները, ինչպես նաև հանդես է

Փորձե՛ք առանձնացնել սոցիալական աշխատողի հետ համագործակցության առավելությունները

գալիս առաջարկություններով՝ պատժի և վերականգնման վերաբերյալ: Սոցիալական տեղեկատվության զեկույցների օգտագործումը դատավճիռը կայացնելու գործընթացում հնարավորություն է տալիս դեպքի քննարկման ժամանակ հաշվի առնել բազմաթիվ առանձնահատկություններ, որոնք հաստատում են անհատի մեղավորությունը կամ անմեղությունը:

արդարադատության համակարգի և անչափահասի շահերի մակարդակներում:

Դատարանում բազմամասնագիտական թիմի աշխատանքը իրականացվում է 2 հիմնական ուղղություններով: Դրանք են՝ աշխատանք երեխաների և ընտանիքների հետ, աշխատանք սոցիալական ցանցի հետ:

Երեխաների և ընտանիքների հետ աշխատող սոցիալական աշխատողից պահանջվում է.

- աշխատել երեխաների, երիտասարդների և նրանց ընտանիքների հետ՝ նրանց կարիքների ամբողջական գնահատման նպատակով, մասնավորապես, պարզել հանցագործության իրականացման պատճառները,
- մշակել անհատական վերականգնման պլան յուրաքանչյուր երեխայի համար՝ երեխայի և նրա ընտանիքի հետ խորհրդատվությունների արդյունքում,
- իրականացնել անհատական ծրագրեր՝ նախաձեռնելով միջամտությունների մի ամբողջ շարք, որը կարող է ընդգրկել սոցիալական դեպքերի հետ անհատական աշխատանք, ընտանեկան աշխատանք, ինչպես նաև երեխայի պատժի իրականացման վերաբերյալ հանդես գալ համապատասխան առաջարկություններով:

Սոցիալական ցանցի հետ աշխատանքը ենթադրում է հանդիպումներ և քննարկումներ սոցիալական ցանցի անդամների հետ երեխայի հետագա սոցիալական վերականգնման գործընթացի իրականացման ընթացքի վերաբերյալ: Երեխայի սոցիալական ցանցը ներառում է տվյալ սոցիալական դեպքի հետ առնչվող բոլոր կազմակերպություններն ու շահագրգիռ կողմերը (ոստիկանության անչափահասների գործերով զբաղվող բաժիններ, համայնքային վերականգնողական կենտրոններ, երեխաների իրավունքների պաշտպանության բաժին Երևանում, իսկ մարզերում՝ ընտանիքի, կանանց և երեխաների իրավունքների պաշտպանության բաժիններ, համայնքի խնամակալության և հոգաբարձության հանձնաժողովներ, ընտանիք, կրթական և առողջապահական հաստատություններ, ՀԿ սեկտորում գործառնող կառույցներ և այլն), ովքեր ևս կստանան պարտավորություններ երեխայի սոցիալական վերականգնումն իրականացնելու գործընթացում:

Դատարանում սոցիալական աշխատողը.

- իրականացնում է մեղադրյալի քրեական գործի բազմակողմանի ուսումնասիրություն, որն ընդգրկում է մեղադրյալի սոցիալ-հոգեբանական և հոգեհուզական առանձնահատկությունների ուսումնասիրությունը՝ ներգրավելով նաև հարակից անհրաժեշտ մասնագետների կարծիքը (ընդ որում՝ ինչպես պետական, այնպես էլ հասարակական սեկտորը ներկայացնող),
- նախնական քննության և դատաքննության ժամանակ մեղադրյալի իրավունքների և օրինական շահերի ոտնահարման դեպքում կազմակերպում է իրավունքների և օրինական շահերի պաշտպանություն,

- տեղեկացնում է դատավորին մեղադրյալի իրավունքների և օրինական շահերի խախտման մասին՝ նման իրավիճակները կանխելու և անչափահասի իրավունքները պաշտպանելու նպատակով,
- մեղադրյալի համար կազմում է հասցեական վերականգնողական պլան և կազմակերպում դրա իրականացումը,
- նյութեր է պատրաստում և անցկացնում հաշտեցման գործընթացը,
- կազմակերպում է մեղադրյալի հետ անհատական սոցիալական աշխատանք,
- մեղադրյալի սոցիալ-հոգեբանական վիճակի մասին իրականացված հետազոտության արդյունքների մասին վերլուծական զեկույցներ է պատրաստում՝ դատավորին ներկայացնելու համար,
- կազմում և ներկայացնում է առաջարկներ, որոնք վերաբերում են մեղադրյալին անհրաժեշտ սոցիալական վերականգնողական օգնության կազմակերպմանը,
- կազմում է իրականացված աշխատանքի մասին հաշվետվություն և այն ներկայացնում դատարան:

Եթե, այնուամենայնիվ, դատարանը նշանակում է անչափահասին ազատազրկումը որպես պատիժ, ապա փոխվում է օգնող մասնագետների միջամտության ուղղությունը: Անչափահասը, մուտք գործելով քրեակատարողական հիմնարկ, բախվում է մի շարք խնդիրների հետ՝ պայմանավորված նոր միջավայրով, մեկուսացմամբ, նոր կարգավիճակով և դրանից բխող դերերով, ինչպես նաև շփման նոր ցանցով: Սակայն, անշուշտ, այս խնդիրներից առավել խնդրահարույցն անչափահասի համար թերևս մնում է ընտանիքից բաժանումը:

մասնագետներն անչափահասին նախապատրաստում են նոր միջավայրին, ինչպես նաև հնարավորինս փորձում են պահպանել շահառուի նախկին օգտակար սովորույթները կամ ձևավորել նորերը, օրինակ՝ սպորտով զբաղվելը, կազմակերպել անչափահասի կրթությունը, աջակցել մասնագիտության ձեռքբերման հարցում և այլն: Այս փուլում սոցիալական աշխատողը կապ է հաստատում անչափահասի ընտանիքի հետ և փորձում է ապահովել անչափահասի և իր ընտանիքի միջև կապն ու դրական հարաբերություններն ազատազրկման ողջ ընթացքում: Եթե ընտանիքի հետ հարաբերությունները խաթարված են, սոցիալական աշխատողը իր ջանքերը կենտրոնացնում է դրանք կարգավորելու ուղղությամբ, քանի որ հատկապես քրեակատարողական հիմնարկից դուրս գալուց հետո ընտանիքի աջակցությունը շատ կարևոր է երեխայի համար: Այս փուլում սոցիալական աշխատողը բազմամասնագիտական թիմի և շահառուի հետ համատեղ կազմում են սոցիալական վերականգման պլան, որն ուղղված է անչափահասի առջև ծագող հիմնախնդիրների լուծմանը, նրա վարքի փոփոխության շարժառիթների առաջացմանը, ինքնագիտակցության զարգացմանը և առավել ընդունելի արժեքային համակարգի ձևավորմանը:

ազատազրկման տարբեր փուլերում բազմամասնագիտական թիմի անդամների աշխատանքի նպատակադրումների փոփոխությանը:

Երբ անչափահասն արդեն ադապտացվել է, և սոցիալական վերականգման պլանն արդեն հստակ մշակված է, սկսվում է **բուն միջամտության փուլը**: Այս փուլում բազմամասնագիտական թիմը սկսում է աշխատել առկա և առաջացող հիմնախնդիրների հաղթահարման ուղղությամբ: Մասնավորապես՝ այդ հիմնախնդիրները կարող են լինել առողջական, սոցիալական (ընտանիքից բաժանում, ընտանիքի սոցիալապես ոչ բարենպաստ պայմաններ, ընտանեկան կոնֆլիկտներ /երեխա-ծնող, երեխա-երեխա, երեխա-ընտանիքի տարեց անդամ, երեխա-այլ հարազատներ/, օգտակար

սոցիալական կապերի խզում), հոգեբանական խնդիրներ ինչպես ընտանիքում, այնպես էլ իրավախախտում կատարած անչափահասի կյանքում (ընտանիքից և հասարակությունից մեկուսացման հետևանքով սթրեսային իրավիճակներ, վախ ազատագրկման հետ կապված, նոր անձանոթ միջավայր և այլն), կրթական, իրավական և այլն:

Անչափահասին հասարակությունում վերաինտեգրելն անչափահասների գործերով արդարադատության կարևորագույն սկզբունքներից է: Ազատությունից զրկված անչափահասների պաշտպանության մասին ՄԱԿ-ի կանոնները սահմանում են, որ պետք է ձեռնարկվեն բոլոր միջոցները՝ արտաքին աշխարհի հետ անչափահասների պատշաճ շփումն ապահովելու համար, որն արդարացի և մարդասիրական վերաբերմունքի նրանց իրավունքի մի բաղադրիչն է: Անչափահասները պետք է հնարավորություն ունենան շփվելու իրենց ընտանիքների, ընկերների, տարբեր կազմակերպությունների ներկայացուցիչների հետ: Նրանց պետք է թույլատրվի դուրս գալ հաստատությունից՝ ընտանիքին այցելելու, կրթություն կամ մասնագիտական ուսուցում ստանալու կամ այլ կարևոր նկատառումներից ելնելով (Կանոն 59) [2]:

Քրեակատարողական հիմնարկից դուրս գալուց հետո վերաինտեգրման գործընթացը բազմամասնագիտական թիմի կողմից շարունակվում է, և այստեղ սոցիալական աշխատողը մի քանի ամիսների ընթացքում իրականացնում է շարունակական վերահսկում:

Անչափահասների վերաինտեգրումը սովորաբար հանդիսանում է համայնքի գործառույթ: Համայնքային վերականգնողական կենտրոնները անհատական զարգացման ծրագրերին համապատասխան իրավախախտում կատարած անչա-

փահասներին տրամադրում են սոցիալ-հոգեբանական, կրթական և պրակտիկ հմտությունների զարգացման ծառայություններ, որոնք ուղղված են իրավախախտումներ կատարելու արմատական պատճառների վերացմանը և դրանց ազդեցության հետագա կանխարգեմանը: Վերականգնողական կենտրոնը իրականացնում է վերականգնողական աշխատանք երեխաների հետ, ովքեր ուղղորդվել են ոստիկանության, հանրակրթական դպրոցների և այլ կառույցների կողմից: Այս կենտրոնում ներառված բազմամասնագիտական թիմի անդամների նպատակն է ապահովել անչափահասների լիարժեք սոցիալական վերականգնումը և ներառումը:

«Նախարարների կոմիտեի կողմից անդամ պետություններին ուղղված Եվրոպայի խորհրդի պրոբացիոն կանոնների վերաբերյալ CM/Rec (2010) 1-ին առաջարկության մեկնաբանությունները» փաստաթղթում նշված են նաև հանցագործությունից տուժած անձանց հետ աշխատանքի կանոնները (Կանոններ 93-95) [3]: Սոցիալական աշխատողները այս ոլորտում ներգրավվում են հիմնականում անձին պատճառված վնասը գնահատելու համար (ֆինանսական, ֆիզիկական և բարոյական), որի արդյունքում վճիռը մարմնին է ներկայացվում տուժողի վրա հանցավոր գործողությունների ազդեցության մասին տեղեկանք (Victim Impact Statement): Բացի այդ՝ ընդունված կարծիք կա, որ հանցագործություն կատարած անձանց ուղղման միջոց է պարտավորեցնել նրանց կրել իրենց կատարած արարքի հետևանքները՝ հատուցելով կամ վերականգնելով տուժած անձին պատճառված վնասը կամ կորուստը [4]: Սոցիալական աշխատողը ներգրավված է նաև մեղիացիայի գործընթացում:

Այսպիսով, այս դասի շրջանակներում քննարկեցինք

- վերականգնողական արդարադատության համա-

տեքստում սոցիալական ոլորտի տարբեր մասնագետների խնդիրներն ու գործառույթները,
կարևորեցինք

- սոցիալական աշխատողների և այլ մասնագետների դերակատարությունը հանցագործությունից տուժած կամ հանցագործության վկա անչափահասների սոցիալական վերականգնման գործում:

ԲԱՌԱՐԱՆ

Այլընտրանքային պատիժ - Դատավորի կողմից արձակված դատավճիռ, որը կապված չէ ազատագրկման հետ և ներառում է տարաբնույթ միջոցառումներ ու միջամտություններ, այդ թվում՝ վերահսկողություն, ուղղորդում և աջակցություն:

Անհատական վերականգնողական պլան - Գրավոր փաստաթուղթ, որն ընդգծում է, թե ինչպես, երբ և ով պետք է բավարարի կյանքի դժվարին իրավիճակում հայտնված երեխայի զարգացման կարիքները թե՛ կարճաժամկետ և թե՛ երկարաժամկետ առումներով: Անհատական վերականգնողական պլանը պետք է մշակվի երեխաների, ծնողների և այլ շահագրգիռ անձանց մասնակցությամբ: Այն պետք է կանոնավոր կերպով թարմացվի և վերանայվի բոլոր ներգրավված անձանց կողմից:

Անչափահասների արդարադատության համակարգ - Լայն իմաստով՝ անչափահասների կողմից կատարվող իրավախախտումների կապակցությամբ արդարադատություն իրականացնող հաստատությունների, կազմակերպությունների և ընթացակարգերի ամբողջություն: Անչափահասների արդարադատության համակարգը ենթադրում է ինչպես դատական, այնպես էլ ոչ դատական, նույնիսկ ոչ իրավական մարմինների համալիր, որոնց գործառույթները նախկինում ընկալվել են, որպես օժանդակ, իսկ այսօր դրանց մասնակցությունն ու դերակատարումը կարևորված է արդարադատություն իրականացման գործընթացում [1]:



Ցուցումներ

Ուշադրությամբ ծանոթացեք տերմիններին, իսկ դասի տեքստի յուրացման հետ կապված դժվարությունների դեպքում կրկին անդրադարձեք դրանց:



Մինչև 25 րոպե

Բազմամասնագիտական թիմ - Լայնորեն կիրառվում է սոցիալական դեպքի վարման ընթացքում՝ ապահովելու համար դեպքի ուսումնասիրության և սոցիալական վերականգնման պլանի մշակման ժամանակ բազմակարծություն և երեխայակենտրոն որոշումների ընդունում: Որպես կանոն, իրավախախտում կատարած անչափահասների հետ աշխատող բազմամասնագիտական թիմի անդամ են հանդիսանում սոցիալական աշխատողը, հոգեբանը, սոցիալական մանկավարժը, իրավաբանը և հարակից այլ մասնագետներ:

Մեդիացիա կամ միջնորդություն - Կամավորության և գաղտնիության սկզբունքի վրա հիմնված գործընթաց, որի ընթացքում մեղադրյալին, կասկածյալին և տուժողին հնարավորություն է տրվում ոչ շահագրգիռ միջնորդի աջակցությամբ լուծելու հանցագործության հետևանքով ծագած վեճը և վերականգնելու տուժողի խախտված իրավունքը:

Շեղվող վարք - Տվյալ հասարակության մեջ ընդունված նորմերին հակասող վարք:

Պրոբացիա - Սոցիալ-հոգեբանական ծառայությունների համակարգ՝ ուղղված հանցանք կատարած անձի վերահնտեգրմանը, վերասոցիալականացմանը, նրա կողմից նոր հանցանքների կանխմանը, ինչպես նաև հանրային անվտանգության ապահովմանը: Այն իրականացվում է հանցանք կատարած անձի նկատմամբ այլընտրանքային խափանման միջոցների, ազատությունից զրկելու հետ չկապված պատիժների, անվտանգության միջոցների կիրառման, պատիժը պայմանակա-

նորեն չկիրառելու, պատժից պայմանական վաղաժամկետ ազատելու, պատժի կրումից ազատելու կամ պատժի կրումը հետաձգելու ընթացքում հսկողություն, ուղղորդում և աջակցություն իրականացնելու միջոցով:

Վերասոցիալականացում - Իրավական, կազմակերպական և սոցիալ-հոգեբանական միջոցառումների ամբողջություն, որն ուղղված է իրավախախտում կատարած անձանց արժեքային կողմնորոշումների և վարքագծի վերափոխմանը՝ հասարակության կողմից ընդունելի նորմերին և վարքի նմուշներին համապատասխան: Վերասոցիալականացումը ներառում է ինչպես աշխատանքային, այնպես էլ կենցաղային հարմարումը:

Սոցիալական ադապտացիա - Անձի հարմարման գործընթացը տվյալ սոցիալական պայմաններին:

Սոցիալական աշխատանքը - Մասնագիտական գործունեություն, որի նպատակն է աջակցել անձանց, սոցիալական խմբերին և համայնքներին՝ լուծելու անձնական և սոցիալական խնդիրները սոցիալական պաշտպանության, օգնության, շտկման և վերականգնման միջոցով: Սոցիալական աշխատանքը նպաստում է հասարակական փոփոխություններին, միջանձնային հարաբերությունների կարգավորմանը, ինչպես նաև մարդկանց բարեկեցության մակարդակի բարձրացմանը:

Սոցիալական աշխատող - Մասնագետ, ով օգնում է անհատներին, խմբերին և համայնքներին լուծելու իրենց սոցիալական հիմնախնդիրները՝ այդ նպատակով օգտագործելով առկա միջոցներն ու հնարավորությունները կամ ստեղծելով նորերը:

Սոցիալական ցանց - Անձի հետ որոշակի կապեր և փոխազդեցություն ունեցող անձանց և սոցիալական կառույցների ամբողջություն, որի արդյունավետ օգտագործումը կարող է հանդիսանալ հիմնախնդիրների հաղթահարման կարևոր ռեսուրս:

Սոցիալական դեպքի վարում - Ծառայությունների և աջակցության ցանցի կազմակերպում, համակարգում և պահպանում՝ բազմազան կարիքներ ունեցող մարդկանց կյանքը բարելավելու նպատակով:

Սոցիալական մանկավարժ - Մասնագետ, ով ուսումնասիրում է անձի դաստիարակության և ձևավորման վրա սոցիալական միջավայրի ներգործությունը:

Սոցիալական վերականգնում կամ ռեաբիլիտացիա - Միջոցառումների համակարգ, որն իրականացվում է պետական և հասարակական կազմակերպությունների կողմից և ուղղված է քաղաքացիների սոցիալական իրավունքների պաշտպանությանը: Սոցիալական վերականգնման գործընթացը ենթադրում է անձի և հասարակության փոխազդեցություն, որը մի կողմից միտված է հարստացնելու անձի հասարակական փորձը, նրան հասարակական կապերի համակարգ ներառելու նպատակով, իսկ մյուս կողմից խթանում է դրական ներանձնային փոփոխությունները:

Սոցիալապես ոչ բարենպաստ պայմաններ - Կյանքի պայմաններ, որոնք խոչընդոտում են անձի զարգացմանը և ադեկվատ (համապատասխան) գործառնմանը:

Վերաինտեգրում - Միջոցառումների համալիր՝ ուղղված անձի

խախտված կամ կորցրած հասարակական կապերի և հարաբերությունների վերականգնմանը, ինչը թույլ կտա նրան լիարժեք գործառնել սոցիալական միջավայրում և փոխազդել այլ անձանց հետ՝ զերծ մնալով հանցավոր վարքագծից:

Վերականգնողական արդարադատություն – Արդարադատության հայեցակարգ, որը շեշտադրում է ոչ թե հանցանք կատարած անձին պետության կողմից քրեական պատասխանատվության ենթարկելու և պատժելու անհրաժեշտությունը, այլ, առավելապես, հանցանք կատարած անձի և տուժողի (նրա օրինական ներկայացուցիչների, ծնողների) երկխոսության արդյունքում գործի հանգուցալուծումը, կատարված հանցավոր արարքով պատճառված վնասի, խախտված իրավունքների վերականգնումը, կատարված արարքի արդյունքում հնարավոր բացասական հետևանքների կանխումը, հանցանք կատարած անձի վերասոցիալականացումը և նրա հետագա հանցավոր վարքագծի կանխումը:

Վերականգնողական աշխատանք - Հանցագործություն կատարած անձի՝ հասարակությանը վերաինտեգրելու գործընթաց՝ կամավոր կերպով և վերջնական ազատվելուց հետո՝ կառուցողական, պլանավորված և վերահսկվող եղանակով:

Օգնող մասնագետ - Մասնագետներ, ովքեր նպատակ են հետապնդում բարելավել երեխայի կյանքի որակը, պաշտպանել նրա շահերը և իրավունքները: Հիմնականում խոսքը վերաբերում է հետևյալ մասնագետներին՝ սոցիալական աշխատող, սոցիալական մանկավարժ, հոգեբան, հատուկ մանկավարժներ և այլն: